

靜  
志  
居  
詩  
話

靜志居詩話卷三

秀水朱竹垞先生著

扶荔山房編輯

貝瓊字廷琚一名闕字廷臣崇德人洪武初徵修

元史除國子助教遷中都國子助教有清江集

姚文公燧爲承旨時一日玉堂宴集聲妓畢奏有真真

者操南音公疑而問之泣對曰妾建寧人西山之苗裔

也父司筦庫於濟寧坐盜用縣官錢賣妾以償遂流落

倡家公憫之遣使白丞相三寶奴爲落籍且謂翰林屬

官王棣杕華曰汝無妻以此姬配汝吾卽其父也貲裝

皆出於公棣後官翰林待制廷琚爲作真真曲以紀事  
盛傳於時廷琚從學於楊廉夫其言曰立言不在嶄絕  
刻峭而平行爲可觀不在荒唐險怪而豐腴爲可樂蓋  
學於楊而不阿所好者也其詩爽豁類汪朝宗整麗似  
劉伯溫圓秀勝林子羽清空近袁景文風華亞高季迪  
朗淨過張來儀繁縟愈孫仲衍足以領袖一時此非鄉  
曲之私天下之公言也

徐一夔字大章天台人徙嘉興元末建寧教授洪  
武初召修禮書終杭州府學教授有始豐類稿

實錄洪武二年八月詔儒臣纂修禮書徵儒士徐一夔  
梁寅劉于周子諒胡行簡劉宗弼董彝蔡深滕公琰至  
京時曾魯以元史方成奏畱之同纂修三年九月書成  
賜名大明集禮通五十卷授曾魯徐一夔周子諒董彝  
以官梁寅等六人以疾賜還鄉里宋景濂撰楊廉夫墓  
志云國朝天下大定詔遺逸之士纂禮樂書君被命至  
京師僅百日而肺疾作乃還卒年七十五洪武庚戌夏  
五月也而梁孟敬贈徐大章序則云吳元年丁未歲以  
詔徵至都大章亦見徵是時置三局一律局二禮局三

誥局余備員禮局而大章撰誥文同居官寺者半歲云云若是則禮局律局同時分設而大章孟敬俱於吳元年卽被徵矣實錄又載吳元年八月徵江西儒士劉于等至京欲官之俱以老病辭各賜帛遣還則劉于亦以吳元年卽被徵矣且劉宗弼者承直之字承直於吳元年十月官國子司業不應於洪武二年又同遺逸之士並徵也又中書省定律令亦係吳元年十月事至十二月律令成命頒行之則律局可輟不煩二年猶與禮局並存也此皆事之大可疑者相傳廉夫賦老客婦詞進

御其辭云老客婦行年七十又一九按是歲己酉廉夫  
年七十有四爾何必增益其齒以誑孝陵邪殆好事者  
爲之又攷當日同修禮書尙有魯淵道原實錄削而不  
書者以道原書未成時先卒也梁孟敬有輓詩載石門  
集大章遺藁罕傳余於京師見之今刑部尙書新城王  
先生貽上所凡四冊比余家藏者倍之然驗其目無詩  
猶未是足本也

梁寅字孟敬新喻人元末辟集慶路儒學訓導洪  
武初徵修禮書書成以老疾辭歸有石門集

孟敬入禮局雖不爲好爵所縻然石門集中賦南歸則  
云煌煌乎大明之盛典兮搜巖穴而旁徵承賜金之渥  
恩今荷錫服之殊榮寄子岷詩云赫赫皇明文治肇興  
惟俊良是詢惟隱淪是徵嗟余罷老亦承詔以行東武  
吟云隋珠耀明月和璧誇縣黎及時不自獻明君焉得  
知寓館咏懷云聖君優老無窮感京城元夕云萬里昇  
平感聖朝洪武元年正月四日恭覩龍飛歡忭而作詩  
云赫赫大明逢盛代載歌周雅贊皇文感恩頌德之詞  
不一而足方之抱遺翁似有間矣故序於通籍者之列

張翬

或作翼

字翔南建德人徙居嘉興元至正乙巳

舉于鄉薦主甬東書院山長不就吳元年徵入

禮局告歸有梓宇集

洪武修禮書吾鄉與者三人徐一夔大章陳世昌彥博  
及翬也翬所居有巨梓一夔爲作記楊廉夫亦有題詠  
故翬作楊哀辭有云志梓寓榮袞裏兮又斯昌乎聲詩  
梓宇集不傳朱翰輯攜李英華取其詩壓卷

又云辛丑夏留湖上昭慶僧舍時錢受之曹潔躬周元  
亮施尙白諸先生先後來游杭人有持元西湖竹枝譜



鐵先生甲乙者先生謂曰和者雖多要不若老鐵次日  
羣公泛舟於湖曹先生引杯曰鐵厓原倡之外誰爲  
場各舉一詩不當者罰周先生舉陸仁良貴作云山下  
有湖湖有灣山上有山郎未還記得解儂金絡索繫郎  
腰下玉連環施先生舉張簡仲簡作云鴛鴦蝴蝶盡雙  
飛楊柳青青郎未歸第六橋邊寒食雨催郎白苧作春  
衣南昌王猷定于一舉嚴恭景安作云湖中女兒不解  
愁三五蕩槳百花洲貪看花間雙蛺蝶不知飛上玉搔  
頭吳袁于令令昭舉強珣彥栗作云湖上女兒學琵琶

滿頭都插鬧妝花自從彈得陽關曲只在湖船不在家  
武進鄒祗謨許士舉申屠衡仲權作云白苧衫兒雙髻  
丫望湖樓子是儂家紅船撐入柳陰去買得雙頭茉莉  
花錢唐胡介彥遠舉徐夢吉德符作云雷峰巷口晚涼  
天相喚相呼出采蓮莫爲采蓮忘却藕月明風定好迴  
船蕭山張杉南士舉繆侃叔正作云初三月子似彎弓  
照見花開月月紅月裏蟾蜍花上蝶憐渠不到斷橋東  
山陰祁班孫奕喜舉釋文信道元作云湖西日脚欲沒  
山湖東月出牙梳彎南北兩峰船上看恰似阿儂雙髻

鬟錢唐諸九鼎駿男舉馬琬文璧作云湖頭女兒二十  
多春山兩點明秋波自從湖上送郎去至今不唱江南  
歌予曰諸公所舉皆當然未若吳興沈性自誠之作也  
其詞云儂住西湖日日愁郎船只在東江頭憑誰移得  
湖山去湖水江波一處流不獨寄託悠遠且合竹枝縹  
緲之音曹先生曰然於是諸公皆飲予亦浮一大白回  
思舊事四十年矣朔南詩云南高北高峰頂齊錢唐江  
水隔湖西不得潮頭到湖口郎船今夜泊西溪其旨與  
沈作略同又吳世顯彥章詞云湖中日日坐船窗水面

鯉魚長一雙好寄尺書問郎信  
惱人湖水不通江意亦相合然俱未及沈之俊逸也

劉儼字敬思錢唐人元末隱居西湖明初徵入修禮樂書授廣東市舶司令有樗隱集

敬思爲管長史訥之師其卒也管哭以詩云痛哭劉夫子如今隔九泉家聲俱溢耳才望孰齊肩百氏遭漁獵羣經費討研薦章何懇懇東帛竟茈茈東壁星辰表西清雨露邊班陪黃閣老名厠玉堂仙禮樂皆新製方輿有續編宣麻應內命行李忽南遷漢節衝蠻雨黎歌入

瘴煙客庖魚米賤商舶象犀聯省檄官將調郵書訃遽  
傳哲人其逝矣小子獨凄然踵接才雖劣心喪禮自專  
不如雙眼淚何日罷潺湲丁鶴年極稱之

魯淵字道原淳安人至正辛卯進士江浙儒學提  
舉洪武初徵修禮樂書詔授江西按察司僉事  
以病辭有魯道原詩集

道原爲沈原昭之師常與楊廉夫張光弼校文貢院其  
題入貢圖詩云九州文軌車書混萬里梯航玉帛齊感  
懷詩云越裳翡翠供輸少遼海雲航漕運通蓋猶及見

元盛時者其後幾死於寇極其顛沛晚宿新岑詩云杜鵑山外家千里姑惡聲中淚兩行誦之亦可悲矣

附錄愚山云道原前進士明初應召入禮局辭還山  
王逢贈詩云相期文苑傳獨立義熙年亦有元遺民  
也

劉永之字仲修清江人明初徵士有山陰集

仲修應聘入都以耳疾辭其秣陵述懷詩云誤蒙曲臺  
召秉筆從諸公則亦徵入禮局之一人矣宋景濂以辭  
章翰墨雙絕稱之贈詩云多少薦紳求識面江南文價

爲君低觀集中與梁孟敬論春秋書謂胡氏之春秋非  
經之本旨自爲一書可爾使聖人者若後世之法吏深  
文而巧詆蔑乎寬厚之意此其失非細故也其識出環  
谷東山諸君之上其詩務去陳言取材新穎五言如青  
年杜書記白髮漢郎官澗水穿林去山雲帶雨回雨微  
簷溜緩風急鴈聲稀野燒兼風起邊烽共月升春明三  
壽草雪映九英梅蟹舍能畱客漁舟不畏風鹿盧花下  
轉蒿苳雨中鉏白鶴窺殘奕青童埽落花路危楓葉斷  
石險桂根懸鹿柵成山壘漁梁阻澗泉七言如過橋柳

暗鳥爭樹當戶花開燕入簷近瀑飛雲經樹溼穿花流水過橋香朱絃鏤管書苔紙銀簾秋衾夢橘湖古硯自磨銅雀瓦坐氍還疊罽賓毼石泉落處寒兼雨楓葉飄來冷帶霜杜若烟生螺子港桃花水暖象牙津千峰靜對芙蓉幕三峽遙連蠓螋橋竹嶼暝煙浮翠黛石田秋雨潤銀沙沙田紫蔗家家熟野徑丹楓處處飛井底龍飛山客見峰頭鹿過野人知白雲當戶心同靜亂竹侵階手自刪何其似姚少監鄭都官也

孫作字大雅以字行一字次知江陰人洪武癸丑



召修日歷書成除翰林編修以老病乞外授太  
平府儒學教授入爲國子助教遷司業有滄螺  
集

編纂日歷洪武六年九月事也先是徐大章報王子充  
書曰近世論史者莫切於日歷日歷者史之根柢也其  
法以事繫日以日繫月以月繫時以時繫年猶有春秋  
之遺記事之法無踰此也宋重史事日歷之修必諸司  
關白如詔誥政令則三省必錄兵機邊事則樞庭必報  
百官之拜罷刑賞之與奪臺諫之論列給舍之繳駁經

筵之論答臣僚之轉對侍從之直前故事中外之囊封  
匭奏下至錢穀甲兵獄訟造作凡有關政體者必隨日  
以錄歲終監修宰相點檢修撰官日所錄事有失職者  
罰之其慎重若此日歷不失則後日會要之修取於此  
他年實錄之修取於此百年之後紀志列傳取於此此  
宋氏之史所以可據也元則制度文爲務從簡便不置  
日歷不置起居注獨中書置時政科以一文學掾掌之  
以事赴史館及一帝崩則國史院據所付以修實錄若  
順帝三十六年事旣無實錄又無參稽之書惟憑采訪

靜志居詩話

卷三

九 扶荔山房

以足成之竊恐其事未必覈其言未必馴其首尾未必  
貫也其論實自大章發之修日歷者七人孫大雅與焉  
大雅自號東家子以文見知於牛士良宋景濂爲作東  
家子傳謂他人之文束於理則辭不暢肆於辭則理不  
直惟公洞矚千古之上折之則理勝闢之則辭嚴動有  
據依皆非臆說其推許至矣詩絕去元季之習好盤硬  
語有云蘇子落筆崩海江豫州吐句敵山岳湯湯濤瀾  
絕崖岸粦粦木石森劒槊二子低昂久不下藪澤遂包  
羆與鱷至今雜還呼從賓誰敢崛強二子角吾尤愛豫

章撫卷氣先愕磨牙咋舌熊豹面以手捫膺就束縛士  
如此老固可佳不信後來無繼作蓋欲力追涪翁宜詩  
之不肯猶人也

錢宰字子予一字伯均會稽人元進士明初以明  
經徵修禮樂書授國子助教乞歸召較書翰林  
加博士致仕有臨安集

博士吳越武肅王十四世孫孝陵命撰帝王廟樂章稱  
旨每進見輒賜坐侍食嘗賦早朝絕句云四鼓鼕鼕起  
著衣午門朝見尙嫌遲何時得遂田園樂睡到人間飯

熟時明日文華讌畢帝諭曰昨日好詩朕曷嘗嫌汝何  
不改作憂字又曰朕今放汝去好放心熟睡矣乃遣還  
二十七年詔徵同揭軌等二十六人定正尙書蔡氏傳  
命開局翰林院賜綺繪衣被入朝班侍衛之首賜飲酒  
樓還里年九十六乃卒二十四人者黃觀景清在其中  
實錄特刪去蓋永樂中以名在姦黨故也博士詩波瀾  
老成諸體悉稱韓宜可唐愚士皆師之

揭軌字孟同臨川人洪武初以明經舉除清河主  
簿升知縣謝歸教授生徒召定書傳會選

永樂中蜀人晏振之金陵春夕詩云花月春江十四樓  
十四樓者來賓重譯清江石城鶴鳴醉仙樂民集賢謳  
歌鼓腹輕煙淡粉梅妍柳翠也姜明叔蓉塘詩話謂皆  
在聚寶門外然中旣以清江石城爲名必不皆在聚寶  
門矣周吉父撰金陵瑣事謂有十六樓在城內者曰南  
市曰北市在聚寶門外之西者曰來賓在聚寶門外之  
東者曰重譯在瓦屑壩者曰集賢曰樂民在西關中街  
北者曰鶴鳴在西關中街南者曰醉仙在西關南街者  
曰輕煙曰淡粉在西關北街者曰柳翠曰梅妍在石城

門外者曰石城曰謳歌在清涼門外者曰清江曰鼓腹  
所載特詳楊用修藝林伐山遺南市北市陳魯南金陵  
世紀遺清江石城因曲就十四樓之目而誤也相傳定  
正蔡傳書成宴編纂諸臣於醉仙樓上然揭孟同詩云  
詔出金錢送酒壚綺樓高會集文儒題曰宴南市樓則  
非醉仙明矣實錄洪武二十七年八月庚寅新建京都  
酒樓成先是上以海內太平思欲與民偕樂乃命工部  
作十樓於江東諸門之外令民設酒肆以接四方賓旅  
既又增作五樓至是皆成賜百官鈔宴於醉仙樓九月

癸丑定正蔡傳書成賜諸儒宴及鈔俾馳驛還是則編纂諸儒先與百官並賜宴者醉仙樓也繼以書成賜宴者南市樓也蓋酒樓本十六其一北市樓建後被焚此實錄止言增建五樓也當日諸樓皆有官妓不獨輕煙淡粉梅妍柳翠爲然故李公泰叔通集句詩於北市則云極目亂紅妝於集賢則云妙舞向春風於清江則云時囀遏雲聲於鼓腹則云舞破日初斜於石城則云翠袖拂塵埃於來賓則云烟花象外幽於鶴鳴則云白日移歌袖而孟同詩云詩寫桃花歌扇底酒攜楊柳舞樓



前又云龍虎關河環錦繡鳳凰樓閣麗煙花又云趙女  
酒翻歌扇濕燕姬香襲舞裙紆追憶承平都會之盛君  
臣相遇之隆亦一段佳話也

附錄姜明叔云國初於金陵聚寶門外建輕煙淡粉  
梅妍柳翠十四樓以聚四方賓客觀揭孟同宴南市  
樓詩可知國初搢紳宴集皆用官妓與唐宋不異後  
始有禁耳

趙搗謙名謙一名古則餘姚人洪武初徵修正韻  
出爲中都國子監典簿罷歸尋以薦召爲瓊山

教諭卒於官有考古餘事

明祖正韻一書出自獨斷天子考文諸臣敢不敬應  
謙於六書四聲最精焉肯盡棄其學而順帝之則其見  
黜也必因不苟附和而然不在年少也旣歸築考古臺  
述聲音文字通書成賦詩云文字聲音歎久訛十年辛  
苦事研磨誰云沈約知音甚未許楊雄識字多魚魯從  
今堪辨析鼎鼐由昔費摩挲總憐朋舊微鍾子歸卧雲  
山看薜蘿當知臺名考古心非正韻爲今矣

高啟字季迪長洲人洪武初召修元史授翰林院

國史編修官擢戶部侍郎放還尋坐法死有鳳  
臺吹臺江館青邱南樓槎軒姑蘇雜詠等集自  
選爲缶鳴集景泰中吳人徐庸彙爲大全集

侍郎跌宕風華鳳觀虎視造邦巨擘所不待言而何仲  
默別推袁景文第一試合諸體觀之袁自非高敵也世  
傳侍郎賈禍因題宮女圖其詩云女奴扶醉踏蒼苔明  
月西園侍宴回小犬隔花空吠影夜深宮禁有誰來孝  
陵猜忌情或有之然集中又有題畫犬一詩云獨兒初  
長尾茸茸行響金鈴細草中莫向瑤階吠人影羊車半

夜出深宮此則不類明初掖庭事二詩或是刺庚申君而作好事者因之傳會也

又云李迪楚宮詞云細腰無限空相妒不覺瑤姬夢裏逢秦宮詞云掖庭無用恩難報願上蓬萊采藥船魏宮詞云至尊莫信陳王賦那得人間有洛神思非不深第傷於巧不若吳宮云芙蓉水殿屢廊疎白苧秋來不耐風教得君王長夜醉月明歌舞在舟中殊近雅也

附錄李賓之云國初稱高陽張徐李迪才力聲調過三人遠甚百餘年來亦未見卓然有以過之者

靜志居詩話

卷三

古

扶荔山房

楊基字孟載其先蜀人居於吳爲饒介客吳平安  
置臨濠復徙河南旣而放歸起知滎陽縣謫鍾  
離用薦爲江西行省幕官坐罪落職居句曲山  
中久之起奉使湖南廣右召還授兵部員外郎  
出爲山西按察副使進按察使尋被讒奪官供  
役卒於工所有睂菴集

吳中四傑孟載猶未洗元人之習故鐵厓亟稱之五元  
美卮言謂孟載七律尙短柳如新折後已殘梅似半開  
時類浣溪沙詞中語予謂不特此也如芳草漸于歌館

密落花偏向舞筵多細柳已黃千萬縷小桃初白兩三  
花布穀雨晴宜種藥葡萄水暖欲生芹雨頡風頡枝外  
蜨柳遮花映樹頭鶯花有底忙衝蜨過鳥能多慧學鶯  
啼且自細聽鶯宛宛莫教深惜燕恩恩春色自來皆夢  
裏人生何必在尊前燕子綠蕪三月雨杏花春水一羣  
鵝江柳淨無餘葉在渚蓮池有一花開花裏小樓雙燕  
入柳邊深巷一鶯啼江浦荷花雙鷺雨驛亭楊柳一蟬  
風山頂雪惟朝北在水邊春已自東來一路詩從愁裏  
得二分春向客中過春水染衣鸚鵡綠江花落酒杜鵑

紅高樹綠陰千嶂溼野棠疎雨一籬香立近晚風迷蛟  
蜨坐臨秋水映芙蓉羅幕有香鶯夢暖綺窗無月鴈聲  
寒睂暈淺顰橫曉綠臉消殘纈膩春紅小雨送花青見  
萼輕雷催笋碧抽尖蠶屋柘烟朝焙繭鵲爐沈火晝熏  
茶試塡入浣溪沙皆絕妙好辭也然其五言古詩足與  
李廸方駕集亦張企鵬所編吾鄉項氏天籟閣藏有孟  
載手錄睂菴集六卷中闕七言絕句以勘張本亦無大  
異

附錄王介人云孟載詞勝於詩其詠春草云六朝舊

恨斜陽裏南浦新愁細雨中亦不失爲佳句也

張羽字來儀以字行更字附鳳溇陽人從父宦游  
江浙兵阻不得歸遂居吳興元末授安定書院  
山長明初徵起廷對稱旨擢太常司丞兼翰林  
院同掌文淵閣事以事竄嶺外未半道召還抵  
京知不免自投龍江死有靜居集

來儀五古微嫌鬱轡近體亦非所長至於歌行雄放駿  
駿欲度季迪前固當含超幼文跨躡孟載

徐賁字幼文其先蜀人徙居吳淮張開闢辟爲屬



避去之吳興隱蜀山中洪武初用薦授給事中  
改監察御史出按廣東改刑部主事陞廣西參  
政遷河南左布政使尋下獄死有北郭集

呂志學題幼文所畫山水圖謂肆筆迥麗清潤而帶書  
法於詩亦然才氣方之高楊張三君稍爲未逮然詩法  
砒然森有紀律長篇險韻極其熨帖頗有類皮陸者張  
來儀先從吳移居戴山以詩招幼文云吳興好山水子  
我盍遷居繞郭羣峰列迴波一鏡如蠶餘卽宜稼樵罷  
亦堪漁結屋雲林下殘年共讀書幼文乃移居蜀山兩

山蓋相望也

附錄愚山云北郭集亦吳人張習編謂幼文以丙辰起家其卒以癸酉七月予考洪武六年癸丑幼文與呂志學宿蜀山書舍爲志學作畫次年甲寅衍師過佛慧精舍題此畫云幼文仕於朝季迪已登鬼錄則幼文以甲寅入朝非丙辰也庚申七月志學題幼文畫云幼文已矣而畫獨存則幼文之死於獄當在己未庚申間非癸酉也載觀高張二集高有答余新鄭詩云君初隨例詣闕下有旨謫徙鍾離城異鄉何人

恤患難喜有楊子兼徐卿去年聖恩念逐客特賜枚  
拭加朝纓初春天子下明詔辭謝不得來南京楊卽  
孟載也余則永嘉余堯臣北郭十友之一蓋三人同  
受淮張辟爲掾屬吳亡例謫臨濠洪武二年放歸余  
主新鄭簿楊知滎陽縣徐未知何官當亦此時銓授  
而季迪徵修元史正在南京得相贈答也楊有夢綠  
軒詩序云予與徐君幼文同謫鍾離結屋四楹幼文  
居東楹予居西楹詩云去年吳城正酣戰却倚危樓  
望蔥蒨今年放逐到長淮萬綠時於夢中見則楊徐

謫濠在吳亡之次年其赦除在洪武二年歷歷可考而張習以爲吳亡後幼文隱居蜀山洪武七年用薦起家習自謂得諸故老傳聞其入朝死獄之年一一舛誤何與

余堯臣字唐卿永嘉人元末自會稽入吳明初謫濠放還授新鄭丞有菜薹集

高季迪春日懷十友詩於余司馬堯臣云列戟衛嚴關應無休沐暇夜飲余左司宅云燈銷月窺闌角警霜委砌答余左司沈別駕元夕會飲城南詩云故人念我有

二子省內郎官府中佐徐幼文萊邁詩題爲永嘉余唐卿左司賦然則左司之稱本於越鎮將版授而司馬之銜疑唐卿曾仕於淮張也

附錄愚山云唐卿居會稽越鎮帥邁善卿參政呂珍羅致幕下有保越之功無意仕進於越之桐桂里治園結草署曰萊邁後入吳居北郭與里中楊基張羽徐賁王行王彝宋克呂敏陳則釋道衍爲高啟十友洪武二年授新鄭丞見於啟詩其曰司馬曰左司必東越鎮將版授之職銜而今不可考矣

王行字止仲長洲人洪武初爲郡庠經師藍玉延

敎其子連坐誅有半軒楮園二集

止仲好談兵游都門人或尼之笑曰虎穴中好休息也  
旣就涼國西塾數以兵法說涼國涼國卒用是敗平居  
於十友中最契道衍贈之序曰上人非若他人事佛奉  
師碌碌作沙門者今天下亂已極且必治治然後出於  
時以發其所蘊其上人之志與當世之人安知終無與  
上人同其志者盍姑有所待也誦其言亦傾危之士乎  
至墓銘舉例一書足爲學文者津筏詩非所長也

宋克字仲溫吳人明初徵爲侍書出爲鳳翔府同

知

仲溫任俠自喜挾彈走馬學握奇陣法張氏據吳欲致  
不得闔門却掃工草隸書祝京兆評其書法天授而高  
侍郎爲作南宮生傳盛譽其詩侍郎又有酬宋軍諮見  
寄詩云少爲鬪雞兒鮮裘奮春明走馬出飛彈撇捩誇  
身輕氣服諸俠徒不倚父與兄落花錦坊南美人理妝  
迎酒酣遊五木脫帽呼輸贏及壯家已破狂游恥無成  
遂尋鬼谷師從之學言兵業成事燕將遠戍三關營奇

勛竟難圖迴臨石頭城覽時識禍機不因憶蓴羹飄然  
別戎府震澤還東征恥求薦辟書傲然揖公卿知音竟  
爲誰四海嗟惻惻又答仲溫見寄詩云念昔文翰場弱  
蹤繼清塵鳴絃東閣夜飛蓋西園晨誦之可得其行槩  
矣惜其詩集罕傳也

孫蕢字仲衍南海人洪武中授工部織染局使出  
爲虹縣主簿選入爲翰林典籍復外補平原主  
簿罷歸尋除蘇州府經歷謫遼東坐黨禍死有

## 西菴集



自黃以下世所稱南園五先生也仲衍才調傑出四人  
五古遠師漢魏近體亦不失唐音歌行尤琳琅可誦微  
嫌繁縟耳集句亦工若秋水爲神玉爲骨芙蓉如面柳  
如眉遶籬野菜飛黃蝶糝徑楊花鋪白氈去日漸多來  
日少別時容易見時難三湘愁鬢逢秋色半壁殘燈照  
病容野草怕霜霜怕日月光如水水如天鶴羣長遶三  
珠樹花氣渾如百和香可稱巧合繼之者如桂嶺瘴來  
雲似墨蜀江風澹水如羅風塵荏苒音書絕人物蕭條  
市井空歸日併隨回鴈盡離魂潛逐杜鵑飛長疑好事

皆虛事道是無情却有情綠水青山雖似舊紅顏白髮  
遞相催此廬陵李楨昌祺所集也如眼前好惡那能定  
夢裏輸贏總不真東澗水流西澗水錦江春似曲江春  
雲收雨散知何處燕語鶯啼亦可傷千里關山千里夢  
一番風雨一番啼慘慘悽悽仍滴滴霏霏拂拂又迢迢  
此瓊州邱濬仲深所集也如文章宇宙千年事江漢風  
流萬古情老去詩篇渾漫與晚來幽獨轉傷神欲知世  
掌絲綸美肯信吾兼吏隱名縱飲欲謀良夜醉殊方又  
喜故人來乘舟取醉非難事送客逢春可自由登第往

年同座主抱琴何處覓知音疎檐看織蠨蛸網遠信閒  
封豆蔻花四海交游更聚散十年京洛共風塵漫說簡  
書催物役猶將談笑出風塵未央樹色春中見茂苑鶯  
聲雨後新自歎馬卿常帶病也知光祿最能詩春浮玉  
藻寒波落水滴銅龍晝漏長佳節每從愁裏過遠書忽  
向病中開江淹采筆空題恨荀令香爐可待熏小院迴  
廊春寂寂北湖南埭水漫漫敢于世上明開眼莫怪先  
生嬾折腰苦節難違天子命夢歸偏動故鄉情舉世盡  
從愁裏老暮年初信夢中忙酒酣嬾舞誰相拽客至從

噴不出迎緩帶輕裘成昨夢濁醪麤飯任吾年古來賢  
達知多少舊日人民果是非新結草廬招隱逸便應黃  
髮老漁樵合歡却笑千年事奉使虛隨八月查復有樓  
臺銜暮景但將懷抱醉春風故國山川皆夢寐昔年親  
友半彫零此長沙李東陽賓之所集也如病身最覺風  
霜早離夢杳如關塞長此休寧程敏政克勤所集也如  
一卧滄江驚歲晚千家山郭靜朝暉嗜酒何妨陶靖節  
能詩重見謝元暉此吳江周用行之所集也如坐看蕉  
葉題詩句醉折花枝當酒籌闔闔迴臨黃道正樓臺直

與紫微連東風已綠瀛洲草閣道迴看上苑花五夜漏  
聲催曉箭千門曙色鎖寒梅雲生紫殿幡花溼月射珠  
光貝闕寒深院沈沈人悄悄春風澹澹影悠悠笙歌縹  
緲虛空裏臺榭參差煙霧中小院迴廊春寂寂前峰後  
嶺碧濛濛離岸游魚逢浪返出林幽鳥向人飛雲閒日  
月臨青瑣花擁絃歌咽畫樓晴雲滿戶圍傾蓋瀑水侵  
階濺舞衣此錢塘沈行履道所集也如念我能書數字  
至似君須向古人求此上海陸深子淵所集也如卿月  
夜臨仙掌動御煙曾見袞龍浮風煙迸起思鄉夢霄漢

長懸捧日心病眼較來猶斷酒新詩改罷自長吟江清  
露白芙蓉死雲散天高秋月明斬竹水翻臺榭淫桐花  
風軟管絃清蝴蝶夢中家萬里鳳皇聲裏住三年愁將  
玉笛傳遺恨暗擲金錢卜遠人路遶寒山人獨去江涵  
秋影鴈初飛陶令久辭彭澤縣山翁長醉習家池虛心  
願比郎官筆感興平吟才子詩漠漠稻花資旅食輕輕  
柳絮點人衣老妻畫紙爲碁局童子開軒埽落花細水  
浮花歸別澗西風落葉掩重門鳥啼深樹斷靈藥馬飲  
春泉蹋淺沙日落遠波驚宿鴈月明芳戍起啼鴉共歡

天意同人意多說明年是稔年倦客閉門三日雨野橋  
流水一犁煙侯門不把馮驩劍客路空攜范蠡圖暮雨  
自歸山悄悄高樓獨上思依依閒尋古寺消晴日却聽  
疎鐘憶翠微日暮酒醒人已遠鳥啼花落水空流清風  
未許重攜手好月那堪獨上樓魚躍鏡中將綠破鳥還  
天外帶青來過橋樹葉邨邊合隔岸柴門竹裏開碎心  
雨夜重檐溷滑足春融一徑泥此廣州張績所集  
也如故里春光榮晝錦上林晴日綯朝衣莫言海上渾  
無地應是壺中別有家紅樹枝頭聞犬吠寒山影裏見

人家溪邊瑤草含朝露天上珠簾卷曙霞鳥啼雲竇仙  
巖靜樹入天台石路新臺上鳳簫秦弄玉鏡中珠翠李  
夫人閒愁却恐驚巢燕往事應須問塞鴻楊柳亭臺凝  
晚翠芙蓉簾幕扇秋紅醉依華屋春多麗貴想豪家月  
最明天上吹笙王子晉雲邊度曲許飛瓊淚殘秋雨遺  
塵韞腸斷春風爲玉簫蝶粉亂翻迎笑臉柳絲輕舞學  
纖腰恍疑瓊島翻成夢只是長安不見人別酒不須花  
底勸淚痕時傍枕函流看花誰與同攜手好月那堪獨  
上樓望斷鴛鴻猶未見可憐蜂蝶却先知石窗花落春



歸處山店燈殘夢到時好夢肯隨蝴蝶去離魂暗逐杜  
鵑飛三春景色佳期誤半夜雨聲前計非遶砌寒風號  
絡緯閉門疎雨落梧桐狂客漫歌金縷曲佳人猶舞越  
羅衣紅樹暗藏殷浩宅青山空遶仲宣樓那堪往事空  
牢落誰共芳樽話唱酬此姑孰夏宏仲寬所集也如山  
橫故國三年別江至潯陽九派分兩岸蘆花飛曉雪幾  
家松火隔秋雲迢迢霽野雲陰合淅淅疎簾雨氣通風  
月無情人暗換江山有待我重來九重霄漢天將近萬  
轉雲山路更賒武帝祠前雲欲散胡公陂上日初低此

安成王佩

所集也如碧落有情空悵望春山無伴

獨相求山中習靜觀朝權洞口經春長薜蘿啼鳥歇時  
山寂寂寒鴉飛盡水悠悠人生有酒須當醉世上浮名  
好是閒嶺樹重遮千里目故人那惜一行書此海鹽朱  
朴元素所集也如柴扉茆屋無人問斷岸寒流到底清  
歸鳥各尋芳樹去寒潮唯帶夕陽還花開花謝常如此  
船去船來自不停流水白雲常自在晚山秋樹獨徘徊  
茶煙漁火遙如畫江水雲山杳莫窮此金華童珣廷瑞  
所集也如萬里悲秋長作客一官羈絆實藏身此崑山

方鵬時舉所集也如鱸魚正美不歸去瘦馬獨吟真可  
哀梁間燕子聞長歎樓上花枝笑獨眠勸君更盡一杯  
酒與爾同消萬古愁此蜀中安磐公石所集也如霜彫  
碧樹作錦樹色過稷亭又草亭諸葛大名垂宇宙元戎  
小隊出郊垌殘花爛漫開何益妙舞透迤夜未休鐘鼎  
山林各天性風流儒雅亦吾師已聞童子騎青竹喚取  
佳人舞繡筵休怪兒童延俗客不勞鐘鼓報新晴病軀  
動資藜牀坐嬾性從來水竹居庾信羅含皆有宅李陵  
蘇武是吾師煙絲碧草萋萋長雨裏紅蕖冉冉香萬里

相逢貪握手百年多病獨登臺此香山黃佐才伯所集  
也如歸信幾番勞遠夢愁心一倍長離憂自願勤勞甘  
百戰莫將成敗論三分此戴天錫維壽所集也如長疑  
好事皆虛事莫遣佳期竟後期素柰忽開西子面芙蓉  
不及美人妝徒勞掩淚傷紅粉但惜流塵暗洞房此劉  
芳節聖達所集也如世態炎涼隨節序人情翻覆似波  
瀾笛怨柳營煙漠漠馬嘶山店雨濛濛綠樹碧檐相掩  
映游絲舞蝶共徘徊人世幾回傷往事愁心一倍長離  
憂浮生已悟莊生夢末路虛彈貢禹冠敗葉殘蟬連漢

苑古煙高木隔棉州五千里外三年客一寸心中萬斛  
愁返照入江翻石壁疎松隔水奏笙簧鳥下綠蕪秦苑  
夕雲凝碧樹渚宮秋此莆田陳言于庭所集也如念我  
能書數字至悲君已是十年流新添水檻供垂釣許坐  
層軒數散愁此廣州黎民表惟敬所集也如衰草夕陽  
江上路漁歌樵唱水邊邨一樽春釀蒲萄綠滿甕秋香  
竹葉青僧歸黃葉林邊寺人候夕陽江上舟此

所集也如顧我老非題柱客凡今誰是出羣雄  
因知貧病人須棄不露文章世已驚逐客雖皆萬里去

雄豪復遣五陵知獨當省署開文苑未有涓埃答聖朝  
天子亦應厭奔走諸公何以答昇平深山大澤龍蛇遠  
古木蒼藤日月昏此關中南師仲子興所集也如天下  
何曾有山水老夫不出長蓬蒿此南海陳子壯秋濤所  
集也如朝雲暮雨連天晴野草閒花滿地愁蘭亭舊路  
雖曾識子夜新歌遂不傳自歎馬卿長帶病何曾宋玉  
解招魂追思往事咨嗟久始覺空門氣味長瑤臺絳節  
游俱遍粉壁紅妝畫不成碧落有情應悵望白雲何處  
更相期鶯憐勝事啼空巷蟬曳殘聲過別枝大抵好花

終易落爭教紅粉不成灰天長地久有時盡物在人亡  
無見期疎檐看織蠨蛸網古木惟多鳥雀聲去日已多  
來日少他生未卜此生休珊瑚枕上千行淚白玉壺中  
一片冰不堪紅葉青苔地早是傷春夢雨天更恨香魂  
不相遇真成薄命久尋思碧莎裳下攜詩草楊柳洲邊  
載酒船春蠶到死絲方盡古柏重生枝亦乾此秀水沈  
德符景倩所集也如孤櫂夷猶期獨往崇山瘴癘不堪  
聞漫說簡書催物役可堪風景促流年津樓故市生荒  
草落日深山哭杜鵑幸與野人俱散誕不嫌門徑是漁

樵此萊陽姜埰如農所集也如早春重引江湖興嬾性  
從來水竹居千樹桃花萬年藥半池秋水一房山側身  
天地更懷古獨立蒼茫自詠詩天下何曾有山水人間  
豈不是神仙王侯第宅皆新主富貴榮華能幾時閉戶  
著書多歲月揮毫落紙如雲煙莫愁前路無知己幾處  
蠻家是主人漢家城闕疑天上武帝旌旗在眼中此嘉  
興周貧青士所集也如芳草有情能下淚野花無語自  
生愁關門令尹誰相識江上漁翁未易名一曲正愁江  
上笛十年如見夢中花世人不識東方朔谷口空稱鄭



子真獨在異鄉爲異客自憐長病與長貧那知白髮偏  
能長莫遣黃金漫作堆爲客馬卿真寂寞依劉王粲本  
淒涼坐中醉客延醒客鏡裏今年老去年樹影悠悠花  
悄悄江蘿漠漠荇田田中郎有女誰堪託伯道無兒最  
可憐仙人有待乘黃鶴壯士徒令感白虹啼鳥歇時山  
寂寂寒鴉飛盡水悠悠羞將短髮還吹帽共踏清歌又  
舉尊江上暮鴻遙送影湖南春草但相思蒼山迢遞成  
千里明月何曾是兩鄉千里雲山何處好十年書劒總  
堪憐波生野水鴈初落風靜寒塘花正開獨坐黃昏誰

是伴每逢佳節倍思親共說陳琳工奏記焉知李廣不  
封侯水浮花片知仙路草帶泥痕過鹿羣晚景莫追窗  
外驥銷憂已辨酒中蛇此蘭谿胡山天岫所集也予叔  
父芾園先生亦雅好集句客至觴行恒舉數聯坐客服  
其工緻予所記憶者如細推物理須行樂高視乾坤又  
可愁庾信羅含皆有宅伏波橫海舊登壇蕭何只解追  
韓信賈誼何須弔屈平料得也應憐宋玉不知何處弔  
湘君能將忙事成閒事不薄今人愛古人豈有白衣來  
剝啄便應黃髮老漁樵閣中帝子今何在河上仙翁去

不回謝朓詩篇韓信鉞老萊衣服戴顓家笑拈霜管題  
詩句閑向春風倒酒餅野廟向江春寂寂殘燈無燄影  
幢幢滕王高閣臨江渚漢主離宮接露臺壺觴須就陶  
彭澤勲業終歸馬伏波皆極自然陸務觀所云火龍補  
黻手非補綴百家衣者比也

附錄曹潔躬云仲衍善言風景於廣州則云丹荔枇  
杷火齊山素馨茉莉天香國於羅浮則云紫極房櫳  
倚日閒蕊珠樓閣中天起於雲南則云蠻官見客花  
布襖邙婦背鹽青竹籃於武昌則云武昌城頭黃鶴

樓飛檐遠映鸚鵡洲漢陽樹白煙景溼行人如鷗沙  
際立使未至其地者誦之亦當神往若酒徒散落黃  
金空獨卧茆檐夜深雨松花酒熟人不歸瑤草東風  
幾回碧風韻不減唐人他如荒蘿遶屋秋夜涼山鬼  
吹燈冷光溼與闌移席傍寒梅雙眼如貓對花碧亦  
不失爲韓冬郎語也

王佐字彥舉家本河東元末侍父宦南雄遂占籍  
南海洪武初徵至京師授給事中有聽雨軒瀛

洲二集

彥舉與孫仲衍結社南園開抗風軒以延嶺表名士及爲給事孝陵賜宋學士黃馬帝爲作歌命詞臣和彥舉有臣騎黃馬當赤心之句賜鈔一錠然其詩遠不及仲衍而當時之論云構辭敏捷王不如孫句意沈著孫不如王不可謂定評也

黃哲字庸之番禺人明初用薦拜翰林待制侍太子讀書尋兼翰林典籤出知東阿縣升東平府通判尋坐法死有雪蓬集

嶺南無雪惟楊孚宅僅一見之杜子美詩所云南雪不

到地也庸之度嶺而北倚篷聽雪詫曰天下奇音莫是  
過矣歸構一軒名聽雪篷鄉里遂稱爲雪篷先生其五  
言詩源本六代七言亦具體品當在仲衍之下彥舉之  
上

李德字仲修番禺人洪武中用薦授雒陽長史遷  
濟南府經歷調西安改漢陽教諭陞義寧知縣  
有易菴集

長史好效長吉孫仲衍戲之曰子誠混元皇帝孫也然  
其詩實與長吉相遠

趙介字伯貞番禺人屢薦辭免坐累逮至京道南昌卒于舟中後以子純熹贈監察御史有臨清集

伯貞絕意仕進植雙松於庭榜曰臨清蓋以淵明自擬也屢往還西樵山中有索題詩者去不顧其集雖不傳然名在五先生之列乃刊詩者去伯貞而冠汪忠勤於卷首可爲失笑也

林鴻字子羽福清人洪武初以薦授將樂訓導久之拜禮部員外與高棅陳亮等同時稱閩中十

子有膳部橐

閩中十子子羽稱巨擘焉而循行矩步無鷹揚虎視之  
姿此猶翡翠蘭茗方塘曲渚非不美觀未足與量江海  
之大

附錄胡元瑞云林員外諸體皆工五言律尤勝置唐  
錢劉間不復辨別七言如珠林霽雪明山殿玉澗飛  
流帶苑牆氣色高華風骨迥爽 愚山云閩人言詩  
者皆本鴻黃元周元祿敏陳仲宏鄭關林伯璟張友  
謙趙迪悉鴻之弟子其詩派繼三唐而祧宋元摹其



色象按其音節庶幾似之其所以不及唐人者正其摹仿形似而不知由悟以入也

高棅字彥恢仕籍名廷禮長樂人永樂初以布衣召入翰林爲待詔久之陞典籍卒於官有木天清氣嘯臺二集

廷禮擬唐如薛稷鍾紹京之雙鉤終下真蹟一等五古皆長空一飛鴈落日千里至夜色不映水微風忽吹裳銜杯雙樹間百里見海色飛雨一峰來微雲度疎竹不失唐人遺韻

王偁字孟揚其先東阿人從父翰宦流寓閩中洪  
武庚午舉人永樂初用薦授國史院檢討命參  
英國公張輔軍事坐黨下獄死有虛舟集

孟揚才名與解大紳相伍其獲罪亦同然詩格華整遠  
勝學士聞當日有明詩選本惜無從見之

王恭字安中自稱皆山樵者閩縣人永樂初以儒  
士薦起待詔翰林與修大典授翰林典籍投牒  
歸有白雲樵唱鳳臺清嘯草澤狂歌

袁景文以白燕詩得名然如月明湘水初無影雪滿梁

園尚未歸翻不若琴川時大本之珠簾十二中間卷玉  
瑤一雙高下飛也顧光遠以白鴈詩得名然如錦瑟夜  
調冰作柱玉關曉度雪侵衣亦不若王安中之夜雨蘆  
花看不定夕陽楓樹見初飛也安中整練不及子羽而  
風華跌宕多縹緲之音固似勝之

附錄林衡者云皆山善得中唐之韻如渭水寒流秦  
塞晚瀟陵殘雨漢原秋他鄉見月長爲客別路逢霜  
半在船鳥外明河秋一葉天涯涼月夜千峰雲歸獨  
樹天邊小雪罷孤峰鳥外青驛館夜殘明候火市樓

霜曉度寒砧  
樓葉上驚新雨  
砧杵聲中憶故園  
幾處移家驚落葉  
十年歸夢在孤舟  
家臨故苑長洲樹  
鐘度寒山半夜船  
帆飛楚水舟中飯  
夢繞淮山樹裏行  
均有大歷十子遺音

黃元字元之侯官人官泉州訓導

林子羽倡風雅於八閩從之游者頗衆而獨矜許二元  
爲入室弟子其贈元之詩云予也夙穎悟十五始知文  
冥心三十年尋源頗知津探竒始有得服膺如獲珍逝  
將覺後生庶以酬先民青衿二十徒達者惟黃元持此

欲有授二元乃其人然二子詩太荏弱句續字湊不能  
成家似非孟揚漫士皆山之伍南皮李氏稱二子詩託  
興悠遠殊不爾也

靜志居詩話卷三